

**Golongan Wanita Dapat Fokus Istimewa Dalam Belanjawan 2012 - Shahrizat Bernama
09 Oktober , 2011**

KANGAR, 9 Okt (Bernama) -- Golongan wanita mendapat fokus istimewa dalam Belanjawan 2012 sebagai usaha kerajaan meningkatkan tahap pengupayaan mereka termasuk di sektor ekonomi, kata Menteri Pembangunan Wanita, Keluarga dan Masyarakat, Datuk Seri Shahrizat Abdul Jalil.

Sehubungan itu, beliau yang ditemui selepas merasmikan program Kembara Nur peringkat negeri Perlis di Kuala Perlis dekat sini berharap golongan wanita memanfaatkan peluang itu dengan sebaik mungkin.

Sebagai contoh, Shahrizat berkata, bagi menyemarakkan kegiatan ekonomi di kalangan wanita, Amanah Ikhtiar Malaysia (AIM) akan menyediakan sebanyak RM2.1 bilion sebagai pembiayaan pinjaman mikro dengan kira-kira 90 peratus usahawan yang mendapatkan khidmat AIM adalah wanita.

Ketua Wanita Umno Malaysia itu menyifatkan fokus istimewa terhadap golongan wanita itu sejarah dalam Belanjawan negara.

Menurutnya, kebijaksanaan kepimpinan wanita dalam politik mendorong kerajaan memberi tumpuan istimewa kepada golongan wanita negara ini.

Sementara itu, RM24 juta diperuntukkan sebagai bantuan kepada 8,644 penduduk Perlis sejak Jan lalu melalui pelbagai program di bawah kementerian itu.

Bantuan terbesar ialah di bawah program Kebajikan Rakyat 1Malaysia membabitkan peruntukan sebanyak RM21 juta kepada 8,156 penerima melalui Jabatan Kebajikan Masyarakat (JKM).

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=618797>